

Te Bwatoro n Ran are E Uruaki

E bwatakataka Kadie. E na kanga n ibuobuoki Sophia?

Iroun Noelle Lambert Barrus
(E boboto i aon te karaki ae koaua)

E riki te karaki aei i Sierra Leone.

Ekakauongo raoi Sophia nakon ana tia reirei ngke e kabwarabwara te numera iaon te burakibooti.

“Ao, tera reken ruaiwa kamaitia aua?” e titiraki te tia reirei.

E katea baina Sophia. “Tenibwi ma onoua!” e taku.

E wiingare ana tia reirei. “E eti anne, Sophia!”

Imwiin te kiraati, e a boo aia tai n okira mwee-ngaia. E rianna Sophia ma raoraona. A bane n butii aia bwatoro n ran ao ni mooi ni kabanean aia ran. E kabuebue te bong aei!

Ma Sophia e noora te bwai ae kamiimi. Raoraona



are Kadie e aki mooi n te ran. E bon tii rianna n aki beroro.

“Kadie, e ngaa am bwatoro n ran?” E titiraki Sophia. A bon bane ni bwatakataka n taainako te koraki ni bwaran te reirei.

“E uruaki irou ngkoananoa, ao I aaki kona n kare-kea ae boou,” e taku Kadie. “Ngaia are ngkai I aaki kona n uota au ran nakon te reirei.”

Sophia e baraaki n taraa ana rabwa n ran. E tangiria bwa e na kona n ibuobuoki! Ma e a bane ana ran.

N te bong anne, Sophia e iangoa Kadie ao ana bwatoro n ran are e uruaki. E rangi ni kangaanga aron reken te ran ae e itiaki n te tabo are a maeka iai. Angiia ataei tii teuana aia bwatoro n ran ae a bon kabonganaa naba ni kabanea te ririki. A kaonna man te kaonteina n ran ae bubura ae itiaki man mwee-ngaia. Ko kona n aoraki man nimakin ran ake tabeua. Ngkana akea ana bwatoro n ran, e aki kona n reke te ran are e na uotia man mweengana bwa e na nimma n te reirei.

N te ingabong are imwiina, e karaua ni iangoia bwa e na kanga n buoka Kadie. Ana utu Sophia bon iai tabeua aia bwatoro aika raabwa aika a onrake n te ran. E anaa teuana Sophia nakon ana baeki n reirei, n ikotaki ma are bon ana bwatoro n ran. E bon katinebua ana baeki teutana, ma e aki tabe iai.

Ngke e roko n te reirei, e kunea Kadie.

“Kadie, e a tia n reke am bwatoro n ran ae boou?” E titiraki Sophia.

E ioioa atuuna Kadie ma matana nako naano.

“E raoiroi,” e taku Sophia. “Iai teuana ae I uotia ibukim!”

E angan Kadie te rabwa n ran. E wiingare Kadie.

“Ko rabwa, Sophia!” E koona mwaaka raoraona te inga ae korakora Kadie.

N tain te kiraati, e mooi man ana rabwa n ran Kadie ma ataei ake tabeman. E kukurei Sophia n nooria bwa raoraona e aki bwatakataka.

Ni katoa bong n te wiiki anne, Sophia e uota te rabwa n ran ae tatara ibukin raoraona. Ngkane n te ingabong teuana, tinan Sophia e tabeka ana baeki.

“Hmm,” e taku tinana. “Kanga I namakinna bwa e raka tinebun am baeki.” E kauka te baeki ao e buuta te rabwa n ran are tatara.

“Ko bon nanonna bwa kona uota te rabwa n ran ae tatara aio ibukin te reirei, Sophia?” E titiraki Tinana.

E katoutoua atuuna Sophia. “E uruaki ana rabwa n ran Kadie, ao e aaki kona n karekea ae boou. Ngaia are akea nimana te ran n te reirei.”

“Ai maanra ngkoe n uouota te ran ae tatara nakoina?” E titiraki Tinana.

“Bon tibwa te wiiki aei,” e taku Sophia. “I aki tangiria bwa e na bwatakataka Kadie.”

E wiingare tinana. “E rangi tamaroa kai ko kona n akoa raoraom ao n iangoia. Anne te bwai ae e na bon bae ni karaoia Iesu. I rangi ni kukurei n noria bwa ko katotonga Iesu.” E rabwata Sophia. “Ao I taku bwa iai riki te anga ae ti kona n ibuobuoki iai.”

Tinana e angan Sophia te bwatoro n ran. “Angan raoraom aio bwa e aonga n ae kabonganaa n taainako. N te aro anne ko aaki uouota te rabwa n ran ni katoa bong.”

“Ko koaua raoi?” E titiraki Sophia.

E katoutoua atuuna Tinana. “Eng. Tii tuangnga bwa e na kawakinna raoi.”

E anaa te bwatoro n ran Sophia nakon te reirei. Te moan bwai ae karaoia e angan Kadie te bwatoro.

“Auee,” e taku Kadie. “Ko rabwa, Sophia!” Kadie e rabwatia.

Sophia e namakina te kukurei inanona. E ataia e a tia n buoka raoraona, n aron ae e na bon karaoia naba Iesu. ●



Ko kanga n ibuobuoki nakon temanna?